

15 AUG 1998

SHEIKH AL AZHAR LAWAT MALAYSIA MINGGU DEPAN

KUALA LUMPUR, 15 Ogos (Bernama) -- Sheikh Universiti Al Azhar Mesir, Dr Mohamed Sayed Tantawi, akan melakukan lawatan rasmi empat hari ke negara ini mulai Selasa ini.

Menurut kenyataan Wisma Putra hari ini, lawatan Dr Mohamed, yang pertama bagi Sheikh Al Azhar, adalah atas undangan Perdana Menteri, Datuk Seri Dr Mahathir Mohamad.

Beliau akan diiringi dua orang pegawai, seorang daripadanya Timbalan Menteri Institusi-institusi Al Azhar, Sheikh Ali Muhammad Fathalla.

Ketika di sini, Dr Mohamed yang mempunyai beberapa aturcara akan mengadakan Yang di-Pertuan Agong Tuanku Ja'afar dan mengunjungi Dr Mahathir.

Dr Mohamed akan diraikan pada majlis makan malam di kediaman Perdana Menteri, Sri Perdana.

Sheikh Al Azhar itu juga akan memberi ceramah umum di Pusat Islam pada hari Rabu serta berdialog dengan pelajar Universiti Islam Antarabangsa (UIA) dan mengadakan perbincangan dengan pegawai kanan Bank Islam Malaysia Bhd dan Lembaga Tabung Haji.

Dr Mohamed juga akan melawat Institut Agama Islam Negeri Kedah (INSANIAH) di Alor Setar dan Kolej Ugama Sultan Zainal Abidin (KUSZA) di Kuala Terengganu, kedua-duanya mempunyai program berkembar dengan Universiti Al Azhar menerusi Perjanjian Persefahaman (MoU) yang ditandatangani pada 1991 dan 1994.

Universiti Al Azhar juga menandatangani Perjanjian Kerjasama Kebudayaan dan Akademik dengan UIA pada 1997.

Terdapat 5,101 pelajar Malaysia sedang menuntut di Universiti Al Azhar ketika ini.

-- BERNAMA

RZS oba